

力衛殿堂

唐，惠主，始州永歸縣人。專精律學，居青林寺。時陵陽公臨益州，素少信心，將百餘馱入寺，就佛殿講堂，僧房安置，無敢違者。主從莊還，見斯穢雜，即入房取錫杖三衣而出，歎曰：「死活今日矣！」舉杖向驢騾，一時倒仆如死，主手擎擲之坑中。縣官大驚，執主申狀。陵陽喜曰：「蒙律師破我慳貪，深為大利。」送沈香十斤，綾紬十段。後還京，從受菩薩戒焉。

擯黜豪尼

唐，慧滿，雍州人。七歲出家，後奉敕住弘濟寺。時證果寺尼出入宮禁，取僧寺為菴，滿集眾擯黜；尼訴於東宮，遣詹事杜正倫等解其擯事。滿執法不從，眾懼禍及，遂強解焉。滿歎息不悅者累日，尼後詣滿謝過，滿終不顧。

不受仙書

唐，法常，襄陽人。性剛敏，衲衣囊鉢。畢志卯齋。貞元中，自天台之梅山，梅山者，梅福舊隱也；常寄居之，夢神人告曰：「君非凡流，此石庫中有聖書，受之者，為下界主；不然，為帝王師。」常曰：「此非吾好，昔僧稠不顧仙經，其卷自亡，吾惟以涅槃為樂耳。」神人歎服。

闔門拒子

唐，從諫，南陽人。壯歲出家，頓了玄理，會昌沙汰，潛居皇甫氏別業。大中初復教，因還洛邑舊居。其子自廣陵來覲，與諫遇於院門，不復能識，乃問曰：「從諫大德安在？」諫指之東。子既去，闔門不出。其割愛如此。

抗章不屈

唐，智實，居洛下時，太宗幸洛，詔道士位列僧前。京邑沙門陳諫，有司